

"T'amo: narasiddu in sardu", unu vèideu in sardu pro Santu Balentinu promòvidu dae s'ULS de Tortolì

S'annùntziu publitzitèriu, promòvidu dae s'ULS de Tortolì e creadu dae sa sotziedade Suia in occasione de sa festa de Santu Balentinu, punnat a promòvere s'impreu de su sardu in cada cuntestu, motivende amministradores, dipendenti comunales e assòtzios a giogare unu ruolu ativu in sa difusione sua. S'Assessore Rita Cocco: "Su sardu est una limba pro amare"

At a essere pro su gèsseru de su 14 freàrgiu, in occasione de sa festa de is innamorados, s'annùntziu publitzitèriu de sensibilizatzione a s'impreu de su sardu, pensadu dae s'Ufitziu Limba Sarda de Tortolì, finantiadu cun sa L. 482/99 e LR 22/2018 de sa Regione Sardigna. A prestare sa cara pro su vèideu de una trentina segundos ant a èssere is amministradores, dipendenti comunales, is pitzocos de su Tzentru de Agregatzione Sotziale de Tortolì e is sòtzios de sa Nuova Pro Loco Tortolì-Arbatax, chi ant aderidu cun brègia a sa proposta de s'isportellu linguisticu.

"T'amo: narasiddu in sardu" – afirmat Ivan Marongiu, operadore linguisticu e amministradore de Suia - faghet parte de una prus ampra campagna de sensibilizatzione pranificada dae s'Ufitziu linguisticu de Tortolì. S'obietivu est su de animare amministradores, dipendenti comunales e assòtzios locales a devènnere protagonisti de sa promotzione de limba sarda, imprende-dda cun cussèntzia in cada cuntestu, non àmbitu amministrativu ebbia, ma peri in cussu afetivu. Pro lòmperu unu pùbliku prus ampru, sa campagna de promotzione e sensibilizatzione non s'at a limitare a sa festa de is innamorados, ma at a abbratzare fintzas àteras ocasiones comente a sa festa de sa mama e de su babbu, sa die internatzionale de sa fèmina e sa de sa limba mama. Ant a èssere realizadas brochure e volantinos pro is familias, paris cun imàgines e contentos chi ant a èssere difùndidos in is retes sotziales.

"Amus seberadu de interessare is dipendenti, is amministradores comunales e is assòtzios locales pro afortiare su sentidu de responsabilidade chi issos tenent in is cunfrontos de is tzitadinos" - deccrat Rita Cocco, Assessora a sa Cultura de su Comunu de Tortolì-. "Sa regione destinat risursas pro difùndere e avalorare su sardu in cada cuntestu, e cale occasione mègius de una festa comente Santu Balentinu, sa die de is innamorados? Bolimus chi sa limba nostra non siat allacana in is domos e in is cuntestos privados ebbia, ma chi torret a èssere una limba pùblica e de sa comunidade. In su matessi tempus, bolimus chi torret a èssere peri sa limba de is afetos e de s'intimidade, ca comente a totu is idiomas, fintzas su sardu est una limba romàntica. Duncas, su sardu est una limba de amare e pro amare!".

Segundu su sindigu Marcello Ladu, "non bastat bortare àutos amministrativos o si limitare a organizzare cursos de formatzione pro promòvere su sardu. Est pretzisu chi cadaunu de nois s'impinnet in manera ativa, devenende un'atore e unu protagonista, donende s'esèmpiu suo alleghende-ddu in modu normale e fitianu".

Su videoclip de unos trenta segundos at a èssere publicadu in su giassu istituzionale de su Comunu de Tortolì e in is canales sotziales de s'ente a cumentzare dae sa vigilia de Santu Balentinu.